

四庫全書

史部

欽定四庫全書

平定兩金川方略卷一百九

十月戊申阿桂豐昇額色布騰巴爾珠爾奏言賊人勢處窮蹙死守愈力急切未能攻克自當另由日爾巴當噶一帶為出奇制勝之計但是處箐林深密碉卡亦多賊番已于此分兵防守臣等詢之熟諳番地之番人並與海蘭察額森特等酌議日爾巴當噶以下榮噶爾博以上中間有默格爾一

處雖道路亦陡險林箐亦深密若從得斯東往北
直上山梁則進攻勒烏圍既為得勢而凱立葉日
爾巴當噶之賊反在我兵之後賊人拒守亦屬無
益可以不攻自潰計所需兵五六千人尚可以竭
力抽撥而得因令海蘭察瑚尼爾圖帶兵從深箐
中繞過碉寨搶佔默格爾山梁其默格爾之碉卡
另派官達色帶兵防守自上下壓額森特往上夾
攻得此碉卡則四隊之兵同上山梁相機分頭辦

理但自得斯東前往道路較遠並派烏什哈達富
興海祿於適中之地帶兵接應其遜克爾宗官寨
別留官兵牽綴即於十六日戌刻分隊進發此處
林箐叢深崖礪陡削亂石崎嶇之中加以冰雪凍
滑官兵手足並用爬越而登十七日丑刻海蘭察
瑚尼爾圖之兵將抵碉卡賊已知覺潛來迎敵經
海蘭察奮力殺賊即上默格爾山梁佔住其額森
特官達色督率官兵于海蘭察等甫經繞過之時

亦即將默格爾碉卡三座上下合圍賊雖放鎗迎敵而官兵攀援直上砍開碉門殺死二十餘名餘俱墜入深澗維時額森特等一面留兵交與富興烏什哈達海祿等佔據一面與官達色帶兵趕上山梁同海蘭察等會合將至天明相度地勢令瑚尼爾圖帶兵直佔日爾巴當噶西面突起高峯而海蘭察額森特等帶兵向西面密拉噶拉木山巔往下攻壓遂將密拉噶拉木大寨一座石碉四座攻克

其凱立葉官寨大小與遜克爾宗相等附近寨落頗多即在密拉噶拉木山陰官兵乘勢進攻又將各寨同時克獲勒殺賊番男婦亦多迨至未刻敗遁之賊與勒烏圍等處應援之賊分為三股來衝頭卡我兵亦分三隊乘勢下壓追趕數里鎗箭齊發亦多殺戮查此次官兵因稽淹時日積憤愈勵從並無路徑之處攀越仰攻而進竟日徹夜毫無歇息無不踴躍爭先而賊人亦因出其不意雖竭力

堵禦而已張皇失措是以殲斃至一百五六十名
擒獲活口五名割取首結三十七顆佔據大碣寨
房二百餘間所奪礮位馬匹及牛羊鎗矛諸物無
筭而官兵內傷損甚少令所據之密拉噶拉木從
右手山腿而下距噶爾丹喇嘛寺不過十餘里而
前抵勒烏圍賊巢亦不過二十里且日爾巴當噶
雖尚有賊人佔據但前後皆有官兵自不能復為
死守諒可與五岱之兵不久會合此皆仰賴

睿謨指示因得又破一層險隘除將緊要營卡趕緊嚴
拏並相度機宜迅圖進取奏入

上諭內閣曰阿桂等奏攻得凱立葉下截山梁奪碉殺
賊情形一摺此次將軍等用間出奇制勝調度有方
領隊大臣及在事弁兵均奮勇出力奪碉殲賊甚屬
可嘉阿桂豐昇額色布騰巴爾珠爾俱著交部議叙
海蘭察額森特尤為超勇出羣已授為叅贊大臣仍
著交部議叙其餘將領弁兵并著阿桂等查明咨部

分別議叙賞以示鼓勵

同日阿桂豐昇額色布騰巴爾珠爾又奏言此次進勦以來滿洲索倫官兵弓箭第一得力深為賊人所畏但番地大石林立樹木叢深所發箭枝最易損壞臣等雖嚴飭各官兵樽節使用打仗之後隨時揀回而可用者不過十之二三且在平原接戰至賊衆一經敗竄即可將箭枝盡數揀回而此地箭枝其射落於碉寨內外者一時既難揀拾及

至攻破碉寨後有已不堪應用現在臣等一路所
存之箭雖有贏餘但統計宜喜馬奈各營均有滿
洲索倫官兵自當寬為預備前准彰寶抄送奏稿
稱滇省所存之箭除已赴川省外尚存二十二萬
八千餘枝現在修飾完好裝貯伏思此時川滇一
路並無別項運送物件箭枝送川甚為便易不過
一月有餘可抵成都臣等已行文圖思德令於所
存箭內再挑十萬枝速送川省查收備用爾時軍

務已竣即將此箭枝留貯成都亦與在滇無異奏
入

上是之

同日富勒渾劉秉恬奏言臣等前因日爾拉連日

大雪人夫背運維艱米石致有停積臣劉秉恬即

於本月初十日自楸砥起程調發孟谷三道坪及

楸砥三站人夫前往協運臣富勒渾亦於十二日

自大板昭起程調撥薩拉沙壩三松坪大岩窩四

站人夫先後齊赴山脚合力疏通自初十日起數日以來天氣晴霽臣等親督各站員將所有積米五千餘石通力合作掃數運完一過此處前塗按站轉輸計日即可全到核計共有米一萬餘石實可無虞但該站山勢本屬陡險氣候更覺凜冽若一雨雪交加冰凌凍結究難深恃臣富勒渾前派雅州府縣承辦長運日爾拉米一萬石由別思滿轉運大板昭以資接濟現已陸續到來茲復據軍

需局詳請派木坪長運米一萬五千石至資哩交
收由別思滿一路加夫四千名轉運至大板昭臣

等悉心商酌目下既須預籌饋餉自應即於此路

加增較為捷便惟是底木達一帶舊路俱已改赴

河東自資哩至撒拉向係安設十站經提臣常青

以後路緊要又將運道近河之處改移山上行走

道路更長臣等詳加確核應再加添兩站使夫力

得以稍近從容則輓運益徵迅速即將軍需局所

派人夫四千名合之各站現有之夫分撥運供實
為有備無患如前項人夫一時未能到站即著該
員等就近雇募蠻夫客夫以資應用至北路軍糧
前准文綬揀派能事州縣承辦長運卓克采米二
萬石臣等現復咨催趕運並再酌派一萬石存貯
卓克采以備西路不時之需取攜更便奏入報

聞

十一月甲寅明亮舒常奏言臣於本月十八日晚

間抽派官兵二千五百名同各土兵分隊進攻日
旁查日旁上臨絕壁旁有斜坡細路縈迴僅寬數
尺下至山半復陡起石包賊人即在其上聯絡碉
卡以衛此一帶寨落兵力本難施展惟是周叟官
寨對面之山即係日旁分支山均有路可繞出石
包之後隨派和隆武及珠爾格德阿蘭保科瑪等
督兵從周叟一路晝伏夜行相機進取仍於石旁
正面作為攻擊之狀其斜下山溝有水碓水卡西

與沙壩山相連若能一并攻克則石包以上賊人
四面受敵必難自固約定二十日寅刻各路同時
並舉臣等又派三寶於木克什作為進攻情狀一
面派令奎林富寧敦住舒景安等於西南山腿兩
翼並進以為牽綴是日自黎明起屢次攻撲相持
至午未之間賊礮鎗石甚緊幾至無隙可乘而遙
望日旁山坳內煙焰蔽天隱隱鎗礮之聲不絕已
知得手但念該處分路既多恐兵丁不敷調遣復

令教成等帶兵一千速往接濟隨據和隆武報知十九日午刻官兵繞至日旁山後搶進碉寨賊人鎗石俱不及施兩兵相搏而我兵深入重地勇往倍常沿山上下盡力追殺已將戰碉十餘座平碉二百餘座全數攻獲其山溝內水礮水卡亦經日旁正面發兵佔據至沙壩山賊人幾次衝突已為我兵截往來路而石包上拒守之賊四面無路可逃滾崖落澗無一人得脫現已深入二十餘里若

再進前與阿桂所攻日爾巴當噶止隔一河兩軍
合會不遠奏入

上諭內閣曰此次明亮等攻克日旁奪碉探路籌畫均
合機宜而越險攻碉殺賊全係和隆武功績伊父和
起盡節捐軀應有是子深為嘉慰和隆武著授為都
統以示優獎其調度有方之將軍叅贊及在事出力
之將佐弁兵著明亮查明咨部議叙

上諭軍機大臣曰昨阿桂奏即日可與五岱會合夾擊

日爾巴當噶此路一通自可直抵勒烏圍掃穴擒渠
勢如席卷但思勒烏圍與噶拉依同係賊巢若止攻勒烏圍一
處則噶拉依之賊勢必移聚該處拒守轉予賊人以暇矣前此
阿桂等曾奏稱若從達爾圖西南山梁直下則與勒烏圍僅隔一河
或在河北循山梁而行抄出噶拉依對岸便可至馬
爾邦之後等語屢經諭令明亮若能至彼與富德兩
面夾攻將馬爾邦攻克即可同勦噶拉依賊匪兩面
受敵照顧不暇成功尤可迅速

乙卯阿桂豐昇額色布騰巴爾珠爾奏言自凱立
葉以至榮噶爾博一道山梁袤延直抵勒烏圍處
處有險可恃實為賊巢屏蔽今官兵攻過山梁賊
人已失其險情形窘迫是以十七日未刻滋擾之
後復於十八日子刻又有三百餘人來衝額爾特
興奎等營盤侍衛等一見賊踪分頭奮擊傷斃多
人始行敗竄臣等察勘默格爾以西布拉克森格
斯巴爾兩處碉寨甚多是日派海蘭察額森特等

帶兵先壓布拉克森寨落憑高撲進賊人驚竄官
兵即進攻格斯巴爾兩處寨落三百餘間悉行燒
燬至十九日早望見格斯巴爾寨下峯巒突起之
處名羅卜克鄂博聚集多賊壘石拿卡思欲阻我兵
進取之路隨令巴圖魯侍衛栢凌等分兵兩路直
前衝壓賊人死斃之外四散潰逃又將羅卜克鄂
博佔住並分兵攻取色埒爾等十寨臣等思自日
爾巴當噶以至達爾扎克所有賊人碉卡俱在我

兵之後不可不急為掃除即令富興保寧各於本
隊內抽出官兵先辦日爾巴當噶山險之賊該處
寨落甚大寨後山頂築有碉座寨之左右又有五
碉相護官兵先將寨落攻佔并派瑚尼爾圖帶兵
接應乘勢將左右五碉全行攻克餘賊竄入山頂
各碉之內合力拒守臣等令烏什哈達福康安保
寧由日爾巴當噶之東南迤邐斜上進攻達爾扎
克山梁各碉富興海祿繞出日爾巴當噶之後進

攻山脊中間沙爾達朗碉座臣色布騰巴爾珠爾

策應其日爾巴當噶山頂各碉臣豐昇額督同額

森特瑚尼爾圖率兵攻打俟此處圍攻後海蘭察

帶兵一千由兩碉中間乘隙直衝而過與烏什哈

達合力攻取均於二十日戌刻進發額森特等之

兵先至日爾巴當噶山頂各碉賊尚抵死守禦攻

至二十一日寅刻四面撲進賊不能支官兵遂將

各碉佔據至達爾扎克一處福康安保寧攻其下

烏什哈達攻其上是處碉卡林立峯巒如削比至
寅卯之間烏什哈達督兵蟻附而上直抵碉根四
面撲入賊人勢難支拒又見山梁上海蘭察之兵
將到即棄碉滾崖而遁福康安保寧所攻達爾扎
克下截各碉亦均克獲其富興海祿進至沙爾達
朗是處共有五碉攢在峯頂之下官兵拋入火彈
即時克取并克伊格爾瑪迪伊格爾瑪咱碉卡又
羅十克博溝內尚有碉寨七座亦經額森特奪獲

焚燒所有凱立葉上下山梁礮卡及附近寨落均
已掃除盡淨當與五岱會合惟是現有官兵除留
駐新得地方外不敷前進之用臣等現將附近後
路官兵盡力抽撤約須五六日方能妥辦如抽撤
及前敵之兵合之可得七八千即一擁直壓以成
破竹之勢奏入

上諭內閣曰將軍阿桂自統兵進攻以來實心調度諸
事皆合機宜此次又將日爾巴當噶全行攻克接通

凱立業指日即擣勒烏圍賊巢甚屬可嘉著授為
御前大臣並賞雙眼翎用昭恩眷叅贊海蘭察額森特
屢經奮勉超羣此次奪碉殲賊亦屬出力海蘭察著
在御前侍衛上行走額森特著在乾清門行走頭等
侍衛額爾特藍翎侍衛秦斐英阿於攻克默格爾山
梁時俱能奮勇額爾特著賞副都統職銜在乾清門
行走秦斐英阿著授為三等待衛

上又諭內閣曰此次攻克默格爾山梁及凱立業等處

碩寨在事出力弁兵除已加恩賞撥外二等侍衛庫爾德著賞朗親巴圖魯名號三等侍衛托爾托保著賞楊達克巴圖魯名號黑龍江驍騎校馬濟著賞沙布德克巴圖魯名號俱照例各賞銀一百兩藍翎侍衛吉林烏拉前鋒保任領催寨依永額及原三等待衛披甲効力之巴達瑪俱著授為藍翎侍衛火器營護軍校巴爾布噶勒秉阿著委署護軍章京護軍永亮濟魯勒圖瑠佐著授為額外護軍校俟缺出之日

即行坐補

上諭軍機大臣曰阿桂等奏攻日爾巴當噶等處碉寨並接通凱立葉上截殲戮賊衆覽奏深為欣慰從此攻取噶爾丹喇嘛寺勢俱下壓自屬便易但遜克爾宗尚未攻得仍恐賊自南而來邀截後路此時阿桂若能將遜克爾宗一并攻克自尤妥善否則榮噶爾博一帶山梁甚關緊要前此曾於圖內用硃筆標記兩圈令阿桂派兵佔據阿桂務當斟酌妥辦若已經

佔得始免後路顧慮又據奏脫出之卓斯甲布番人
雍中爾結供稱莎羅奔弟兄現又回勒烏圍念經拒
守等語逆酋兄弟聚集一處其計畫自必更甚若我
兵攻破勒烏圍將逆酋一并擒獲則噶拉依并可傳
檄而定成功尤為迅速惟是逆賊狡黠多端恐見官
軍執盛難敵派人在勒烏圍抗拒而索諾木莎羅奔
弟兄仍回噶拉依為三窟之計以冀緩死須臾亦未可
定阿桂統兵抵勒烏圍時一面進兵攻打一面選派

大員帶兵千餘往截勒烏圍至噶拉依之路使其無從竄回於勦捕尤為得力惟當安酌籌辦毋稍疎懈

丙辰

上諭軍機大臣曰阿桂自用為將軍以來立意進勦籌度合宜屢戰克捷現在內外大臣實無出其右者甚屬可嘉至昨奏欲俟抽撤附近後路官兵合力進取朕揣其意似以逆酋兄弟現聚一處若兵數單弱恐不敷邀截之用致逆酋逸去故欲俟後路之兵抽調充足進擣勒烏圍使逆酋無從竄逸

者傳諭問阿桂其所以待兵之意是否如此若果如朕所料自當安速而行
同日富德奏言查德木特布咱納兩處山根有道
可通馬爾邦賊衆添調碉卡拒守應將是處攻取
方能前進本月二十一日臣派副都統德赫布等
帶兵五隊攻取德木特又派副都統舒亮等攻取
布咱納碉寨明日丑刻各隊官兵奮勇前攻賊
人滾崖落水者甚多德木特布咱納兩處碉寨全
行佔據現在籌辦進攻馬爾邦奏入

上諭軍機大臣曰富德攻取德木特布咱納等處碉寨甚為奮勉此次暫行記功俟得馬爾邦時交部議叙現今將軍阿桂指日可抵勒烏圍與明亮兵會合當此賊人喪膽之際富德乘隙前進攻取馬爾邦更易得手

同日富勒渾文綬奏言

臣等欽奉

上諭令將川省辦差出夫各屬乾隆三十九年以前已經緩徵錢糧分別差務繁簡酌量蠲免

臣

等查川省自辦軍需以來蒙

皇上軫念民勞

恩膏疊沛三十七年分通省錢糧或全行蠲免或酌免
十分之七及十分之五十分之三其蠲剩之項節
年亦予緩徵至三十八九兩年官兵經過之成都
等五十廳州縣均已奉

旨分別緩徵其未過兵之各廳州縣三十七年蠲剩錢糧
亦並緩其帶徵三十八九兩年仍照常徵收今次復奉

恩旨所有兵過地方三十七年蠲剩緩徵錢糧應請全行蠲免

其三十八九兩年緩徵之項按照各地方極衝次衝分別全免及酌免十分之五至未辦兵差之九十廳州縣除已緩之三十七年蠲剩三分五分七分錢糧再行酌予減免外其三十八九兩年原未議緩但該廳州縣等節年出夫辦糧急公踴躍今三十八年分額徵業已照常全完所有三十九年分錢糧應請遵

旨酌免十分之五及十分之三俾閭閻生計寬舒而趨事赴功益加感奮謹分別開單進呈奏入

上諭內閣曰富勒渾文綬等將過兵地方及未經辦差之九十廳州縣節年出夫運糧分別酌免分數覆奏此等急公奉上之民甚屬可嘉著加恩將成都等二十三州縣已緩三十八年錢糧全行蠲免其三十九年錢糧酌免十分之五簡州等二十三廳州縣三十七年蠲剩緩征錢糧全行蠲免其已緩三十八九兩年錢糧各蠲免十分之五天全蘆山茂州松潘四廳州縣已緩三十八年錢糧酌免十分之五溫江等五十六廳州縣三十七年蠲剩

緩征錢糧全行蠲免其三十九年錢糧酌免十分之
五大寧等三十四廳州縣三十七年錢糧蠲剩十分
之三者全行蠲免蠲剩十分之五十分之七者再免
三分並將三十九年錢糧再免十分之三俾閭閻生
計益得寬舒仍俟大功奏捷時另普涯恩以副朕嘉
惠民勞有加無已至意該部遵諭速行

己未明亮舒常奏言

臣

查日旁以前連山上下自

東北至西南綿亘二十餘里寨落相接為斯聶斯

布羅為斯延咱爾為岱谷皆進兵必由路徑過此
即係一片平坡直至臨河均無阻隔而勒烏圍即
在河南相拒本不甚遠惟其西沙壩山尚有賊人
并力聚守至其東為谷爾提官寨上與丹壩相通
東西兩面俱隔溪河依日旁左右分流入於大河
官兵從此取道前進與達爾圖下壓之路相仿且
與日爾巴當噶一路官兵早為會合即可截出賊
境東北先行掃淨其沙壩山堅碕林立一時未可

力取而下面沿山寨落甚多臨溪架有木橋以通
日旁之路賊於橋兩頭各架大礮守護臣明亮派
兵三百名夜半突斫礮門即將兩礮據定二十三
日令珠爾格德科瑪等從日旁山脊分兵數路下
至向西一面斜坡將平房百餘間戰礮二十餘座
全行洗蕩至日旁山腿正面亦經舒景安教成督
兵將石包上兩座賊卡搶佔計日旁一路為金川
緊要門戶今數日以來共克獲礮寨四百餘間殲

戮賊番男婦甚多此次綽斯甲布頭人土兵同屯
土各兵加倍出力臣等量為獎賞乘此兵心踴躍
賊氣披靡之際由日旁前至勒烏圍沿塗即有險
隘無難果入但山環水折後路綿長必須逐處留
兵防範始免疎虞計達爾圖各營實在官兵僅八
千五百餘人而現在派赴日旁進攻止有三千五
百餘人不敷調遣自應籌畫周備方可統衆前驅
臣等再三商酌其營盤應行歸并者碉卡應行添

築者均須布置得宜臣舒常及三寶應暫留在達爾圖次第料理臣明亮先馳赴日旁相機攻取至賊中近日情狀雖節次投出番衆二十餘名其執少為渙散然各處抵拒尚堅二十日所獲賊番四名內有納木克斯丹恁二名俱係年老臨時在碯內投出據綽斯甲布土司稟懇留此二人以便招降各番臣等准其所請即發交土司雍中旺爾結收管其投出之達拉男婦共二十四名俱分別安

挿奏八

上諭軍機大臣曰明亮等奏續克日旁相接一帶碉寨
並稱各營實在官兵僅八千五百餘名自應籌畫周
備方可統衆前驅如此籌辦極是昨阿桂奏亦欲暫
待數日俟各路抽調之兵到齊進攻因索諾木莎羅
奔兄弟俱聚於勒烏圍故欲合集兵力為一舉成擒
之機朕實嘉其深合機宜今明亮所見亦與阿桂相
同尤可望兩人合力會勦速成大功就圖形而論勦

烏圍當係北面臨河或畧偏東阿桂統兵到彼似可
攻圍三面其北面若逼近河干官兵難以屯扎則明
亮一軍不必渡河只在北岸遙為聲援以防截過河
竄逸之賊若勒烏圍碉寨相離尚遠可容官軍屯駐
之地則通知明亮即統兵渡之南岸與阿桂四面圍
勒尤易得手阿桂至勒烏圍時若探知逆酋兄弟尚
同在勒烏圍即速與明亮商酌合力進勦擒渠掃穴
可以一鼓成功則洗蕩勒烏圍之後噶拉依可不煩

而定可為妥捷若索諾木兄弟有已回噶拉依者又當兩路分攻使之照顧不暇則兼令明亮前往馬爾邦之後引進富德同攻噶拉依著傳諭阿桂等妥商速辦

同日明亮舒常又奏言此次續克日旁碉寨屯土各兵均極奮勇內有屯弁郎卡甲噶阿蚌三名綽斯甲布頭人雍中結穆爾安布木達托四名革布什咱頭人伊吉一名爭先搶卡殺賊尤為出力俱

當賞戴白頂藍翎以示鼓勵土舍綽爾甲木燦親自帶兵深入險地督戰甚力今伊弟土司雍中旺爾結代兄懇請加恩奏入

上諭軍機大臣曰綽爾甲木燦帶兵督戰誠心出力甚屬可嘉著加恩賞戴花翎並查照伊弟雍中旺爾結現在所襲係何品級如土司係一品即將該土舍授為二品土司係二品即將該土舍授為三品總較土司次一等賞給頂戴以示鼓勵並著明亮等曉諭綽

爾甲木燦以爾杼誠宣力奏明大皇帝特加恩寵俾
其益知感激立功圖報

平定兩金川方畧卷一百九

欽定四庫全書

平定兩金川方略卷一百十

十一月壬戌阿桂豐昇額色布騰巴爾珠爾奏言
查作固頂穆爾津岡等處賊人寨落一時尚未掃
除則自達爾扎克以至日爾巴當噶現須派兵駐
守所有達爾扎克一路原設兵丁僅敷連絡分駐
之用其遜克爾宗後路官兵儘力抽撤連前敵之
兵約共得七千餘人可供進取惟密拉噶拉木西

直至勒烏圍賊巢俱在榮噶爾博山陰此山大勢
皆向河而下山腿共有四條南一條下至河沿為
冷角喇嘛寺稍北一條名勒吉爾博賊番干上丰
截設立碉赤木城下至河沿為噶爾丹喇嘛寺又
稍北一條名康薩爾其上亦有碉柵山腿稍短不
及至河而止正北一條即羅卜克鄂博現在設立
營赤臣等從密拉噶拉木進攻下壓勒烏圍則康
薩爾及勒吉爾博賊皆拒守甚嚴不免有稽時日

查羅北客鄂博西下過溝另有山腿一道名格魯
克古自東北而西南係作固頂之麓迤邐下至河邊
又分為兩小山腿北有格爾提寨南有得式梯官寨
官兵取得山腿兩寨已直抵大河其作固頂穆爾
津岡康巴達陡烏當噶各處賊寨均為大兵隔斷不
能復於勒烏圍往來是賊境東北一帶可以先為
掃淨由此進退巢穴更無他顧其康薩爾勒吉爾
博賊寨亦已徒守無益臣等擬派兵兩隊一攻康

薩爾一攻勒吉爾博牽綴賊勢其從羅卜克鄂博
至格魯克古山腿中間溝內尚有碉卡一座又派
兵二隊一憑高攻搶溝內碉卡一直上山腿從山
下壓攻取格爾提寨其溝內之兵於攻克碉卡後順
溝而出攻取得式梯寨賊人決不能處處防範可
期必克臣等部署已定即於一兩日內奮迅進攻
至遜克爾宗為勒烏圍一方緊要隘口臣等雖令富興
普爾普成德常祿保等分段防範仍須大員總統

查五代係叅贊大臣若在彼不時督率自更妥協
現已商令移駐日則了口並令審察遜克爾宗賊
情一有可乘之勢即行搶佔

同日阿桂豐昇額色布騰巴爾珠爾奏言從遜克
爾宗前往勒烏圍本有番人平日往來之道但榮
噶爾博一道山梁路徑陡險林箐叢深且賊碉嚴密
難期深入是以大兵從並無路徑之默格爾山梁
繞出柴噶爾博山後先得凱立葉下截山梁而臣

豐昇額並已接通凱立業上截之兵從此據高直取勒烏圍更不必由遜克爾宗而禁噶爾博已自失其險進搃實為較易至勒烏圍沿河一帶又有路可抵噶拉依然地處低下窵以循山上行為得勢查勒烏圍溝水流入於勒烏圍前面大河其將近會合處有甲爾日磔橋在勒烏圍東南應從橋前進上巴爾覺山進至噶爾丹該處山腿兩條一條直下雍中喇嘛寺一條直下噶拉依若大兵抵此

即可掃殄賊巢臣等一得勒烏圍定由此路進攻
均奏入

上諭軍機大臣曰阿桂等奏分路進攻一經得手即無
難進取噶爾丹寺果爾則阿桂與明亮可以會勦勒
烏圍至所稱由勒烏圍往噶拉依之路既係阿桂體
訪得實自屬可信但官兵聲勢甚盛恐賊衆度不能
支潛回噶拉依不可不設法防截又據奏遜克爾宗
為勒烏圍緊要隘口擬令五岱移駐日則了口遜克

爾宗原屬現在緊要後路不可無人防守五岱帶兵駐彼自可望其得力

甲子顏布深奏言副將軍明亮等克捷帶石山梁現在運道由周叟過河沿坡直上即抵新營查舊路周叟運至日旁又運至新營共須五站且由呀噶繞道山徑崎嶇倍為紆阻今自周叟直運帶石約四十里只須兩站帶石至日旁舊營亦約四十里日旁站先已裁撤但大兵新移其達爾圖一帶須

與日旁聲勢聯絡且為馬尼軍營文報所經茲擬
撤呀哨站移設日旁較為省便至達爾圖覺木交
等站尚有駐扎官兵夫役應以木池所收南路米
石供支而北路滾運專供新營倘有不敷即撥木
池米石徑運日旁約計三站亦為不遠再大兵移
營帶石周叟即為後路糧運文報俱由此馳遞差
務繁多原設官兵不敷守護臣已知會鎮臣李時
擴酌撥覺木交兵一百名千把二員以資巡防奏

八

上諭軍機大臣曰顏布深奏酌撥覺木交兵弁巡防自應如此辦理兩路大軍正當乘勝深入剋期奏績之時後路尤關緊要阿桂一路正在合力進攻兵威嚴整賊衆自不敢潛出滋事即明亮軍營卡隘頗能實力周防前此賊出窺伺屢被殲戮諒亦不敢復萌故知惟周叟為明亮軍營後路且係糧報所徑更當加意防守設或踈懈於進兵大局甚有關係李時

擴顏布深務當不時往來稽查慎之又慎明亮等亦
當時刻留心照料

乙丑富勒渾郝碩奏言大兵自攻克默格爾日爾
巴當噶等處又已深入六七十里臣酌量餉運情

形除自梭洛栢古至喇穆喇穆原定三站毋庸更
易外應將格魯瓦覺舊設糧站移安山梁之上作
為一站由格魯瓦覺山梁至該布達什諾又至得
斯東又至密拉噶拉木大營共安三站但得斯東

至大營路徑陡險人夫負重登山較為費力且現與賊人逼近應作站半報銷以示鼓勵其原設喇穆了口色溯普之站即行裁撤隨將了口等站原夫及後路抽調人夫均勻分撥安設加緊輓運其自梭洛栢古至達爾扎克原設五站自凱歌坪至密拉噶拉木大營計程三十餘里俱係新得賊番之地沿山窄徑勢難安設糧站即令直送軍營作為站半凱立業官兵現俱會合所有原設之站業

經裁撤即將原夫分安各站應用並抽撥後路馬
匹安設馬臺軍報現由此路馳遞至將軍阿桂移
營寨拉噶拉木之後臣等恐大兵道遠行速在在
需夫搬運格魯瓦覺一路趕運之糧一時難以充
裕隨於二十九日在達爾扎克運米三百餘石以
資接濟並據總理道白瀛稟報現存米四百七十
八石又收到麵三萬七百五十觔源源趨運可保
無悞再凱立業各站既為糧運正站需夫倍多現

在所有人夫不敷背運查新設之大捷站經署督
臣文綬奏請裁撤今即將大捷站人夫撥到此路
安設實為便捷奏入

上嘉之

丁邗明亮舒常奏言日旁一路去勒烏圍不遠目
下大營所駐地名帶石東為谷爾提西為沙壩山
賊人碉寨相連沿河兩岸皆可前來抄截而派赴
日旁官兵僅三千五百餘人不敷調遣今宜喜達

爾圖俱於扼要地方增築戰碉尚可節省兵力現
派馬彪敖成等帶兵三千餘人在彼防範其餘均
調赴日旁應用前後共得四千餘名查谷爾提一
帶皆有賊番碉寨分布其間為後路必爭之地因
於二十九日派和隆武珠爾格德科瑪等帶兵六
百名分為三路於黑夜中奮力進攻賊番紛紛逃
竄官兵四路追勦將此一帶地方全行佔據並生
擒賊番索爾甲木達爾甲二名訊取供詞即行正

法前月二十七日復有金川頭人阿托及僧格爾加帶同男婦二十名從沙壩山投出業經分別安插奏入

上諭軍機大臣曰明亮等去奏克日旁東西沿河一帶寨落其所到之地與阿桂現攻地方相近漸可會合務即相機進取迅奏膚功至此次攻得碉卡又係和隆武帶兵前往似此屢次出力實屬可嘉但近日帶兵之事何以總未派及奎林似因奎林鎗傷尚未全

愈之故甚為厯念著傳諭明亮等即將奎林傷痕曾
否平復速行據實覆奏以慰懸注但奎林素性勇往
不可因朕有此問勉強從事必俟鎗口痊好如常方
可帶兵行走又據奏有金川頭人阿托帶同男婦來
降其小頭目亦畏罪投出則金川人心渙散可知諒
有瓦解之勢自係最好機會此等投順之人原可貸
死以誘其餘但須擇地安插勿令仍聚原處致生事
端又閱索爾甲木供詞稱係金川巴朗索寨人我本

寨二十多人現俱派在丹壩作固頂看守碉卡等語是丹壩一路相距不遠且閱阿桂進到之圖凱立葉東北即達爾扎克其下即作固頂革什戎岡又其下即穆爾津岡與丹壩甚近今凱立葉徑官兵攻克進攻羅卜克鄂博再進取格魯克古格爾提尤與丹壩相距咫尺五福正當乘此勝勢激勵丹壩土司選派土兵進勦五福即親帶官兵由丹壩一同攻進阿桂等並可與之預約為合力夾擊之計現當大軍窺入復

添此一路官兵賊衆難於支禦成功更可望迅速著
阿桂速飭五福協力進勦奮勇自勵以期立功受賞
臣等謹案由凱立葉迤邐而下距丹壩不遠大
軍自達爾扎克進取作固頂穆爾津岡勢
已漸成破竹我

皇上披圖燭照令臣阿桂於笨入之際預飭五福一路
乘勝夾攻且激勵丹壩土司率兵進勦資其協
力不數日間果從格魯格古順壓河岸勦洗賊

番碉寨接通丹壩之兵兩路會合金川東北一
帶掃除淨盡後路恃以無虞萬里之外符若左
契益

睿畫早周乎前事矣

同日阿桂豐昇額色布騰巴爾珠爾等奏言相度
榮噶爾博山陰形勢酌擬分隊進攻壓至河邊截
斷賊境東北即於初三日派烏什哈達海祿等帶
兵從羅卜克鄂博往攻溝內碉寨又派海蘭察額

森特等各帶一隊俟烏什哈達等克取溝內碉寨
額森特等即繞出溝口攻取得式梯官寨海蘭察等即
踰溝搶上格魯克古山腿下壓格爾提官寨又派官達色
等帶兵堵截格魯克古上截碉寨來援之賊又派福珠 書
麟保寧特成額等分攻榮噶爾博最高峯頂及康薩爾
山半賊碉以牽其勢是日子刻各隊進發烏什哈達等
前至溝中見山腿有碉寨三座相連極為鞏固地
勢險窄係兩路官兵所必經隨即奮勇圍撲一面

拋放火彈攀越碉頂寨內賊人甚衆鎗石如雨且相連各碉之賊合力抵拒官兵難以接踵而登又各山梁賊衆均來應援雖奮力迎擊賊俱遁入林箐而一時遽難得手因將官兵暫撤查溝內相連碉寨其名達斯扎賊人逆知羅卜克鄂博之兵進取必由此處攢集多人死守力攻未免稽時臣等相度形勢是溝迤邐斜上其中碉寨正多由此而上格魯克古了口箐林更密石砌更陡進攻不

無冒險接續亦為非易若令官兵潛斫木植運往
附近賊人不見之地俟官兵橫截而登隨後即趕擊
木柵接連直至溝底則官兵既無後慮而一面勦
洗當噶海碉寨一面踰越了口而西順歷大河之
岸必能將陡烏當噶作固頂穆爾津岡革什戎岡
康巴達一帶賊人掃除淨盡會合五福丹壩之兵
臣等派海蘭察瑚尼爾圖那木扎泰斐英阿官達
色領兵一隊額森特福康安彰靄領兵一隊各襲

帶乾糧為踰溝直搶了口之兵又派烏什哈達海祿
特成額保寧緊隨前兩隊官兵攻打溝內兩旁
碉寨牽綴賊勢並趕築木寨以資聯絡初五日丑
刻海蘭察額森特等於林深月黑之時潛窰下溝
均望格魯克古了口前進是處崖礪壁立手足攀
援及至天明官兵登了口者僅有五六百人其餘
正在續上而各寨賊人已攢集據守滾石放鎗併
力支拒且自上而下直前衝突巴圖魯侍衛薩爾

吉岱等向上奮擊射斃數人賊始遁遁我兵勇氣
倍加緊隨追殺將了口內當噶海寨落佔住乘勢
直上又將陡烏當噶大戰碉攻克海蘭察額森特
等一面帶兵循梁直壓至桑噶斯瑪特一面由陡
烏當噶山腿下來將沙木拉渠什爾德格布則美
第格布則美谷格爾提官寨並溝內一帶寨落攻
克焚燒是時作固頂革什戎岡各碉寨尚有賊
衆但官兵越嶺攀林轉戰一日時已昏黑令暫歇

息而烏什哈達等已將監柵木植穿插關合之處
預先配就俟海蘭察等過溝督兵豎起從山下溝
不及半日已共起木柵二十餘座將達斯扎以上
各寨賊人圍截於內海祿又將溝內之噶納爾覺
克爾布沙巴克烏等碉寨一概攻獲至初六日丑
刻海蘭察等督兵上攻革什戎岡是處雙碉對峙
賊人尚在拒守我兵一擁直上即將碉寨攻克殲
斃甚多其作固頂賊衆業已膽落官兵痛加殲

戮將此一路戰碉俱行分據是日分派官兵一從革
什戎岡下至斯博斯底殺什球勒畢各寨一從作
固頂下至格木伊普拉谷則爾雜谷康巴達各
寨一從作固頂至穆爾津岡將山溝內之特羅克
羅及山梁各碉沿河各寨悉行勦洗焚燒臣豐昇
額色布騰巴爾珠爾親上山梁派巴圖魯侍衛栢
凌等帶兵往接丹壩官兵而五福已隔崩見各處
烟燄飛騰督率官兵將普籠籠瑪讓戰碉數座搶

佔燒燬現已兩路會合統計此次大兵橫越四道
山溝五道山梁直壓河岸而每道山梁迤邐各有
一二十里二三十里不等官兵連日繼夜乘勢奮
攻殺賊二百餘名克獲戰碣五十餘座寨落三百
餘座平碉民寨不計其數竊思凱立葉丹壩兩路
官兵今已接通會合金川東北一帶賊匪淨盡後
路漸覺放心惟是日旁官兵此時尚未下至河邊
所有作固頂以下直至沿河尚須派兵駐守遂令

五福在此分設營卡留心防範又從後路抽撤官兵即日派海蘭察等由得式梯官寨合力進攻

同日阿桂豐昇額色布騰巴爾珠爾又奏言據五福稟稱十月二十日丹壩土舍派出土兵一百二十名又挑派雜谷兵一百名官兵一百名搶獲穆爾津岡西邊戰碣土兵內受傷者二十餘人又令丹壩土舍派出土兵又挑派綠營雜谷兵於二十三日子刻潛攻穆爾津岡碣座賊人鎗石甚緊土

兵陣亡一名受傷者三十餘人又二十七日子刻漢土官兵潛至普籠籠碉下忽有賊番斜衝而至各兵迎敵鏖戰良久賊人被殲帶傷甚衆丹壩土兵內陣亡小頭人拉爾結及土兵一名均奏入

上諭內閣曰阿桂等大兵攻過格魯克古了口接通丹壩覽奏深為欣悅此次官兵等見距賊巢甚近奮勇直前踰越林嶺晝夜鏖戰所至克捷皆由將軍阿桂等審察形勢調度有方甚屬可嘉所有將軍叅贊

等及在事出力將弁均著交部從優議敘其奮勇出力各員俟阿桂等查明奏聞另加恩獎

上諭軍機大臣曰昨計及作固頂一路下通丹壩傳諭將軍等飭令五福率兵由丹壩進攻今五福已從丹壩會合阿桂與朕所降諭旨適合實係極好機會就進到之圖而論東北一帶賊碉盡為官兵等焚燒所存惟西南一角得式梯等數處看來亦易攻克指日即可直抵勒烏圍閱所奏各番供單賊番紛紛出投足見

境內衆心渙散而逆酋等尚將物件用皮船私運噶
拉依雖云瞞著百姓豈能盡掩人耳目更足以啓羣
疑而生惶惑是賊衆滅亡之機日漸彰著又閱圍內
方向丹壩瑪讓普籠籠兩處與明亮駐兵之所僅隔
一河自可即漸會合則攻勦尤為得力此時想已合
兵矣又據奏丹壩土舍派出土兵搶佔戰碉殺死賊衆
頗覺出力其陣亡之小頭人土兵及受傷人著阿桂
等查明照列卹賞該土司屢次派兵恭順奮勉並著查明

咨部卹賞

同日富勒渾郝碩奏言查達爾扎克以西山勢險峻徑陡沙溜輓運人夫難以駐足一經大雪恐不無阻滯因於溝內另得新路一條稍覺平坦必須開修寬敞方可通行至雪山根一站地屬陰坡現已冰雪載塗山徑凍滑亦須斫鑿開通臣富勒渾暫駐達爾扎克督修旋據報將軍阿桂又攻克陡烏當噶一帶山梁我兵已抵江岸日旁丹壩兩路

官兵均可會合臣富勒渾即於初六日復馳赴密拉噶
拉木大營與臣郝碩查詢移營以後連日所運軍
火軍糧具數應用見阿桂稱梭洛栢古地當緊要
該處防兵今已調赴前敵僅駐滿兵一百五十名
未免稍單應於大板昭內酌撥二百名添駐防守
臣富勒渾已如數挑撥並嚴催前調人夫將新安
各站添補齊全加緊轉運奏入

上嘉之

壬申

上諭內閣曰現在四川省軍營連奏克捷直逼賊巢大
功指日告成約計節次所撥軍需銀兩原足應用但
大軍正當乘執深入移營添站需費較多且奏凱後
辦理一切善後事宜及設鎮駐兵不無尚需銀兩著
該部撥銀五百萬兩解交川省藩庫存貯備用

甲戌明亮舒常奏言查日旁東面沿河地方先於
前月二十九日乘勝攻奪其左側隔河自康巴

達上至穆爾津岡東北賊境為將軍阿桂官兵截
住在內以次洗平亦無可慮惟沙壩山環繞右側
樹木叢深賊於山頂連築戰碉九座其下色格
落喀爾提兩處俱在山坳之內各有賊衆上下守
護山勢甚為險要臣等令科瑪帶兵潛上山頂進
攻續派三寶珠爾格德阿蘭保以兵過河攻取河
邊正面賊寨於初八日同時並舉將至辰刻三寶
在正面領兵衝擊賊寨鎗發如雨屢次直前究難

得手因令暫退一箭之地旋據科瑪處報到各兵齊
上山頂一面分兵從碉下截過搶至色格落喀爾
提處拋入火彈延燒賊寨二百餘間賊番力難抵
拒各思逃竄而官兵四面圍攻得脫者甚少但各
處救援之賊接踵而至上下皆為攔截經科瑪督
率革布什咱土兵繞過山溝搶得洛谷一處寨落
已可轉出沿河正面而三寶聽聞鎗音將近復又
督兵仰攻賊人據住隘口迎拒甚力不能會合科

瑪恐佔據山梁糧運或有不繼適有降番俄爾甲
稱有小徑可以撤回因即令其引路徐徐整隊回
營伏思賊人長技不過善守惟將前敵山腿相機
攻克轉出斯年木咱爾官寨之前即可與阿桂軍
聲聯絡

同日阿桂豐昇額色布騰巴爾珠爾海蘭察額森
特奏言官兵前日循格魯克古山梁而下已壓至
桑噶斯瑪特初九日臣海蘭察額森特同福康安

瑚爾尼圖官達色等帶兵將出箐邊見有賊卡兩座官兵憑高躍入殺賊數名餘賊潰散其下尚有小山腿四條賊先已起木柵三座石城一座各山腿左右溝內均有賊寨督兵攻打賊衆守禦甚力因將箐邊賊卡起柵佔住餘兵漸次撤回初十日臣海蘭察額森特復合福康安等分路夾攻殺賊二十餘名負傷逃竄者亦衆又將左右第一山腿石城克獲其餘各路官兵亦俱奮力攻打賊人築石

為牆掘為溝防護愈力圍攻至二更以後賊始從
林箐奔逃官兵截殺及追擊殲死者二三十人滾
落崖箐者無算三道山腿木柵亦盡佔據查桑葛
斯瑪特一帶山梁並無水泉雖官兵攻得格爾提
官寨已抵金川大河之岸而距此甚遠且瀕河地
面尚有賊寨官兵取水仍回至當噶海下格魯克
古溝汲用往來須四十餘里應由山腿擊柵直屆
河沿取携始便十一日早臣等令官兵擊起木柵

於賊人碉寨中橫穿而過雖兩面放鎗而官兵踴躍赴功逐日拏起賊衆二三百人前來衝突又經援應官兵迎擊截殺殲斃五六十名餘俱望風奔竄惟時附近山腿碉寨其被官兵繞集木柵內者業經勦洗而瀕河甲爾納碉寨一處仍有賊人聚守又於十三日派兵三路進攻賊人併力抵禦並於攻急之時出寨衝突又用皮船過渡潛入寨內賊數漸增鎗石益密不值多損官兵因令暫撤官

兵自桑噶斯瑪特而下至現在拏柵之處離得式梯官寨僅二三里距噶爾丹寺不過六七里是以賊人即於甲爾納寨又為苟延殘喘之計但此處地形較敞尚可用圍截之法使其技無所施但須乘賊人張皇之際迅期攻克庶不至停留長智

同日阿桂豐昇額色布騰巴爾珠爾奏言臣等西路官兵又因各山梁後路皆須分兵駐守在遜克爾宗時僅得五千餘人攻得默格爾山梁又於大

營及後路抽出二千攻開日爾巴當噶及達爾扎克
惟時前敵打伏之兵合計已得七千餘名遂即攻
據格魯克古了口併將作固頂穆爾津岡一帶全
數掃除其達爾扎克駐守之兵既可抽撥而丹壩
無需駐守臣等又將五福原帶官兵調來用以進
搗勒烏圍足敷攻取一至勒烏圍則榮噶爾博與
遜克爾宗之賊勢必不攻自竄即將此山梁前後
駐官兵合力進搗噶拉依亦不虞其單弱臣等從

前自谷噶繞至登古羅博瓦又自遜克爾宗繞上
默格爾山梁皆係自東南而西北今順河前進又
係自東北而西南從此每進一程皆可以抽撤之
兵通盤該計則所抽兵丁已足供前進掃犂之用
至明亮處雖已攻克日旁而已距勒烏圍遠近計
之尚在西路官兵之後此時日旁宜喜軍營隔河
遠望俱在目中似從日旁攻進不如從達爾圖木
克什下攻較為捷便

同日阿桂豐昇額色布騰巴爾珠爾又奏言查凱
立葉山梁自達爾扎克迤邐而下中為伊格爾瑪
咱伊格爾瑪迪沙爾達朗日爾巴當噶又自日爾
巴當噶蜿蜒漸下始為凱立葉寨五岱所駐營盤
在達爾扎克之上相距尚有五十餘里臣等前於
十月十七日攻過默格爾山梁將凱立葉官寨民
寨悉行攻克焚燒中間日爾巴當噶等以至二十
一日克取始能接通五岱凱立葉之兵隨將作固

頂穆爾津岡各處掃淨即順從陡烏當噶山腿下
歷河邊而南進攻噶爾丹寺從此進取賊巢雖仍
須越過勒吉爾博及冷角寺兩條山腿之末然地
形稍敞似易得手况官兵攻至勒烏圍則榮噶爾
博各峯之賊負嵎無益勢必不攻自潰至遜克爾
宗既無榮噶爾博賊衆應援亦必棄而勿守似不
虞其翻山而下截我後路均奏入

上諭軍機大臣曰明亮等奏攻取沙壩山寨落科瑪甚

為出力著加恩賞給副都統銜此次官兵進攻畧覺
冒險幸有降番俄爾甲識路引出其人頗為誠心效
順著明亮酌量予賞以示獎勵至官軍奮勇進取固
屬努力但現在功效垂成一切倍宜慎重非實有可
得便宜之處切勿輕進又稱惟當將前敵山腿相機
攻克可望達爾圖山梁官兵乘勝下壓等語因思達
爾圖山梁若能相機下壓自較日旁更為得力但止有
馬彪在彼尚不足恃莫若令舒常前往帶兵駐守審

度事勢而行今明亮等在日旁攻圍雖力但賊人拒守頗嚴急切恐難得手似止可為牽綴之用舒常與往達爾圖時當與明亮商酌於奎林和隆武三寶三人內酌帶一兩人前往遇有可進之機即連統兵下壓出賊人不意亦出奇制勝之一法且官軍果從達爾圖下壓則日旁一帶之賊當必不攻自潰明亮舒常仍得合而為一即可與阿桂會兵攻勦勒烏圍似尤便捷又斯年木咱爾官寨其地似關緊要閱明亮

奏脫出降番供詞其西拉木即係斯年木咱爾寨人
於該處路徑必當熟習若令為嚮導自應妥協明亮
等當斟酌行之又據阿桂奏亦稱從日旁攻進不如
從達爾圖木克什等處下攻較為捷便於朕意正合
君臣意見相同即此足見迅速成功先兆佇聽捷音
又阿桂奏到新舊兩圖閱其圖說阿桂現在進攻噶
爾丹寺之路與朕硃筆標記相同自可盼乘勝速進
至所稱桑噶斯瑪特一路官軍取汲約四十餘里因

令其由山腿拏柵直屆河沿取携始便所辦甚是自當如此籌畫至閱新圖內格爾提寨之北對河西岸有賊卡一處恐賊人偷渡河東潛截格爾提一路官軍之後不可不慮因用硃筆圈記阿桂當於其處加意防察又賊卡西北距明亮軍營甚近若能一體嚴防勿令渡河滋擾自更妥協至所云須乘賊人張皇之際迅期攻克庶不至停留長智所見甚是朕早以此為念是以屢催將軍等相機速進今阿桂亦見及此尤

望其乘勝深入迅奏膚功至所稱官兵攻至勒烏圍則
榮噶爾博各峯之賊不攻自潰即遜克爾宗亦必棄
而勿守就大概情勢而論固屬如此但榮噶爾博遜
克爾宗兩處究係我軍後路萬一我兵進攻勒烏圍
時賊衆在後將臺報糧站畧為阻梗大有關係阿桂
等惟當實力嚴防切勿稍存大意

同日富勒渾奏言自大板昭至密拉噶拉木各站
核計存糧一萬二三千石趕運前敵軍營足資供

應後路之米復源源接續而來更可日增充裕惟
查山脚一站前隔日爾拉山道路峻險冰雪載塗
且從山脚直送大岩窩本係兩站天寒日短人夫
不能轉回臣加派夫六百名撥往前用俾夫力稍
就從容糧運益加迅速再將軍阿桂即日攻克勒
烏圍進取噶拉依應添三四站現准劉秉恬酌調
雜谷腦及大捷站夫二三千名委員陸續解來臣
暫令分安附近各站幫同合力轉輸既可以趨運

軍需又不致虛糜口食大兵一有捷音即就近
調取安設奏入報

聞



平定兩金川方畧卷一百十

欽定四庫全書

史部
平定兩金川方略卷一百十二

給事中_臣查善長覆勘

總校官原任侍講_臣王燕緒

欽定四庫全書

平定兩金川方略卷一百十一

十二月辛巳鄂爾顏希深奏言查周叟至帶石大營約有四十餘里其間層巒疊嶂隆冬冰凍勢難一日往回若於周叟添夫伴得往還更替不惟稍息夫力兼可迅速馳輸查周叟站員向管周叟穆差覺兩站其穆差覺一站原為下接擇里呀骨而設今擇里呀骨一站業經移安日旁所有穆差覺

站夫自當全數撤回歸併周叟內有班滿應換病
故缺額者即於新調人夫內更換撥補惟是帶石
得手之後大兵逼近河岸指日兩路會合糧運軍
火似可歸併一路此時周叟固須籌備充盈亦未
便過於多貯臣等俟近營各站約有一月之糧即
將楸砥以內所運米石酌貯適中之卓克采站以
備調撥奏入報

聞

壬午阿桂豐昇額色布騰巴爾珠爾海蘭察額森
特奏言官兵於桑噶斯瑪特右手山腿下及瀕河
甲爾納等處均已拏柵進逼但賊番聚集死守又
復隔河放礮其旁崖洞又有賊放鎗抵禦難以拏
柵直下官兵駐此每日須派兵仍上當噶海下至
格魯克古溝取汲殊為費力查羅卜克鄂博與格
魯克古中間山溝內有達斯扎寨六座前此攻而
未克察看其下有溪水一道係從桑噶斯瑪特左

手山腿之下西南流入大河攻克此處則羅卜克
鄂博與格魯克古官兵聲勢更為聯絡而由桑噶
斯瑪特山腿下溝取水亦覺稍便即於十五日派
海祿保寧等分兵抄下左右合攻賊衆四散奔竄
經官兵殲斃二十餘人餘賊不敢從正路逃去滾
落崖箐之下跌死亦多遂據碉寨六座並架木柵
直抵溪水之上臣等查看桑噶斯瑪特正支山腿
之下距河亦近但賊人先已架有木城石卡其前

兩邊又有寨落十六日派福康安瑚尼爾圖等分
兵三路下攻克取木城石卡其前右手賊寨亦於
十七日派兵攻得查是處寨落賊人前因距河稍
遠憚於下汲即將達斯扎溝水挖渠一道引至寨
旁取用究不如大河取水更為穩妥但瀕河與甲
爾納相連之寨落兩處賊人聚集死守仍未能直
抵河邊而兩旁鎗石交加力攻恐多傷損稍用礮
力轟摧自能撲取現鑄就四將軍礮位運往轟擊

乘勢搶撲務期必克再桑噶斯瑪特正支山腿下
土岡一處現有官兵駐守所起木柵尚未齊全臣
等計賊人必來搶佔先已派兵設伏十九日丑刻
後果有賊二百餘人欲侵擾土岡迤西木城各兵
合力勦殺賊番奔竄殲殪亦為不少

同日明亮舒常奏言臣等連日哨探賊中舉動其
帶石前敵一時未可力攻即達爾圖木克什等處
碉內賊番嚴防如舊大約東北一帶敗回之賊移

守於此以冀苟延旦夕臣等前因日旁宜喜兩路
兵力稍單所有緊要隘口營壘濠溝均已督率兵
丁增築深固現據馬彪報稱十七日申刻有賊一
百餘人分作前後三隊從沙壩山溝來搶宜喜營
盤當即向下衝殺賊番旋從箐林中四散竄回其
沙壩即係達爾圖向東分枝共有山腿四條其中
地名甚多寨落稠密居日旁之右沿河環繞與達
爾圖山腿相接臣等現將作何用兵可以萬全之

處再四籌度如阿桂所奏由達爾圖木克什下攻較為便捷此本為用兵正路但達爾圖前敵堅礮林立既難得手而木克什以下箐林深密左右兩旁賊番皆可抄截非兵多不敷接應且與阿桂一路聲勢稍遠不能聯絡惟從日旁之帶石攻過一節險要下臨河邊即與阿桂隔河不過五六里自可勢如破竹均奏入

上諭軍機大臣曰阿桂雖未能直攻克得式梯然已佔

據溪水官兵飲汲有資且又多殲賊衆于進剿機宜甚為有益看來賊番因官兵日有深入之勢早已聞風膽寒得式梯噶爾丹喇嘛寺兩處自亦無難攻取即可望直逼勒烏圍就各路情形而論阿桂最為正路且易得手佇盼紅旗捷奏又據明亮等奏賊人近日拒守情形及官兵籌辦進攻事宜是明亮處現尚未能即進然攻剿事關重大必須覓可乘之機動出萬全況我八旗勁旅正當勇敢直前倡導綠營亦皆

奮往惟當養其銳氣以期於事有益此時功屆垂成
尤不可冒昧輕進倘有小挫衆兵或因而氣餒所關
甚大實不可不加慎重況明亮等之兵與勒烏圍只
隔一河若阿桂統兵一到勒烏圍則達爾圖等處之
賊不攻自潰宜喜日旁一路即可開通明亮與阿桂
會合進剿更為得勢

已丑阿桂豐昇顏色布騰巴爾珠爾海蘭察頗森
特奏言臣等思遜克爾宗尚有賊番固守惟什爾

德山腿分支有舍圖旺喀一處若得此處則遜克爾宗之賊往還不使自難固守而賊酋等又恐大兵從此分路並進亦可以大分其勢當派普爾普等帶兵進攻其桑噶斯瑪特山腿下甲爾納相連兩寨節經運到礮位施放兩日礮身孔穴亦多因於二十八日丑刻進取惟是該處田鋤甚高官兵跳躍而下不無聽聞聲息官兵將抵賊寨即已鎗石交加死守抵禦攻至寅刻各處賊番沿河潛入

寨內合力抗拒未能即克

同日阿桂豐昇顏色布騰巴爾珠爾又奏言金川

小頭人綽窩斯甲至營臣面加詢問告以若能詳

悉分付令衆人解體亦足見汝出力即令綽窩斯
甲到卡倫前高聲曉諭以現在

大皇帝所欲誅者惟在土司索諾木及作惡大頭人丹
巴沃咱爾山塔爾薩木坦阿木爾克窩斯甲當噶
拉阿木爾克窩其餘若能投出均予寬宥若被大

兵圍住寨落再無饒恕今大兵已抵此處指日攻
至勒烏圍須各自打算不可錯悞又有其親戚二
人前來綽窩斯甲復密告以汝等若能同莎羅奔
等謀將土司擒獻不惟免罪還可有功惟時臣等
先派屯弁阿拉班達爾甲土弁賡噶等在旁監視
體察綽窩斯甲所與賊番言語俱係切實曉諭尚
無暗使狡詭情形查綽窩斯甲前往曉諭明係渙
散人心之計賊番似宜憤怒乃聞聽之下俯首無

辭其為衆心漸散於此可知均奏入

上諭軍機大臣曰阿桂等所攻甲爾同一處為進剿得式梯噶爾丹寺路所必經賊匪自必悉力拒守攻之頗為不易其得式梯噶爾丹寺兩處諒亦相同但形勢均屬自上壓下尚無難設法攻取且有天礮轟摧尤可望其迅行得手惟是大兵深入功在垂成一切倍宜慎重固不可過於寬緩使賊匪得以負固稽誅亦不可冒昧輕進致有小挫貽誤阿桂等惟當斟酌

妥行又據奏綽窩斯甲到軍營即令至卡倫前曉諭
衆番似覺心動是綽窩斯甲尚知順逆誠心內向至
其密告親戚謀將土司擒獻之言雖有賡噶等在旁
監視未識曾否聞其密語如所言果係如此尚屬意
圖報効阿桂或再察其在營舉動安妥並不妨賞給
藍翎金頂以示獎勵不必復交成都安插

庚寅明亮舒常奏言帶石以前一過石包而下即
斯年木咱爾官寨再進即得式梯官寨若從前敵

正面攻開直至河干可與阿桂一路會合但賊番
剗挖地窖密排石卡又兼兩旁山勢陡險一線路
徑僅可魚貫而進是以賊衆負險固守其隔河以
東之格爾提已被西路官兵掃殄惟沙坭山一帶
箐林叢密山上山下碉卡林立抵死據守若攻克
此處可以直至河邊壓攻斯年木咱爾不特沙壩
山頂碉卡不攻自潰即前敵石色亦攔截在後賊
人斲難久持臣等撥派屯土各兵並派弁員督同

前往又令投番霍爾甲等引導二十一日子刻阿
蘭保等帶各屯土兵過河分為四股霍爾甲等四
人各引一股潛入箐林逾溝越險直逼賊寨賊人
猝不及備出寨逃竄被殺約二十餘人燒斃者亦
復不少但所佔寨落相隔窩遠非多兵不能聯絡
隨將木薩等寨燒燬即從原路撤回

同日明亮舒常又奏言查土司承襲職銜三品為
宣慰司其次為安撫司等具頂帶宣慰司始用亮

藍頂乃土司等固知體制輒皆僭用紅頂相沿已久未便遽為改易所有綽斯甲布土司雍中旺爾結雖係安撫司品級現用素紅頂土舍綽爾甲木燦現用亮藍頂今奉

諭旨較土司次一等賞給頂帶自應給與花紅頂以示鼓勵但臣等現交綽爾甲木燦籌辦進攻俟有勞績賞給奏

聞至各土舍等向皆僭用頂帶指日大功告竣自宜酌

定以昭體制均奏入

上諭軍機大臣曰明亮等奏焚燒沙琪山坡寨落情形甚好昨據阿桂奏現在攻打甲爾納賊碉一經攻得即可進剿得式梯及噶爾丹喇嘛寺似已搽必勝之勢今明亮等奏與得式梯相去不遠是兩軍指日會合成功尤當迅速佇聆捷音至明亮等奏投番霍爾甲等四人尚屬誠心効力明亮等當酌量賞賚以示獎勵所稱各土司土舍等多僭用頂帶指日大功告

竣應再酌定之處尚未妥協土司等頂帶久經相沿
僭用若於成功之後再將已用之頂帶改降恐不足
令其感悅莫若俟大功告成後傳朕旨曉諭隨征各
土司以爾等所襲職銜若照定例宣慰司係三品止
應用亮藍頂安撫司係四品止應用暗藍頂而歷來
土司等多有越品僭用光紅亮藍者本應照所有品
級遵改各項頂帶今大皇帝念爾等誠心出力甚屬
可嘉現在大功告成即著照爾等現用頂帶賞給作

為加銜榮耀以示優獎土司等自當益知踴躍感戴
辛卯富德奏言臣等於本月二十五日派札爾桑
等分兵三路攻穆當噶爾盛得爾瓦古山口而官兵
奮勇直前先奪取盛得爾瓦古卡子四處殺賊二
十餘人即進攻穆當噶爾要隘殺賊五十餘人隨
造木城佔據奏入

上諭軍機大臣曰富德奏將賊番緊要碉卡奪獲佔據
痛殲賊衆官兵俱各奮勇甚屬可嘉俟攻得穆當噶

爾山梁進取馬爾邦將出力兵弁一併議叙

同日桂林奏言西北兩路大軍逼近賊巢而富德馬尼一路乘勢進攻一有會合消息自必移師繼

進際此軍行迅疾運供最關緊要臣與臬司李世

傑已將口外現有夫糧逐一密為核定相機供億

至富德前敵瀕河一帶前經李世傑趕辦竹纜等

物相度水勢酌搭索橋並添造木船以備利濟再

雅州為南路糧運總匯該處素產茶斤民夫背赴

打箭爐其利較勝於運米若因運米而使茶不能
通暢未免於稅課有關今鹽道杜玉林請將長運
爐城糧石即拍殷實茶商照給米石運價並准其
順帶茶斤仍於經由要隘按數稽查小民奉公之
餘兼資謀利自無不倍加踴躍況茶為番地所必
需茶斤到爐日多則各土司烏拉亦不期而雲集
於南路軍儲實有裨益奏入

上嘉之

甲午旺保祿王進奏言十一月二十七日附近
思巴寨之角寨山溝內報有賊匪形跡即令富昌
阿馬彪等領兵追擊斃賊二人帶傷者數人餘俱
逃竄其往南逃竄二人被舍隆卡上官兵協同擊
獲訊供一名甲噶爾太一名舍尚彭俱係小金川
羅博寨人去年隨頭人進金川派交金川頭人莫
撒斯把守功噶爾拉並無別情已經梟首訖仍嚴
飭各卡隘嚴防毋稍懈怠奏入

上諭軍機大臣曰旺保祿等奏拏獲賊番二名訊係潛放夾壩並無別情隨即臬示所辦尚未的當此等賊番固不可留但亦須訊供明確再行正法方為妥協番人偷放夾壩乃其常技然或由功噶爾拉賊目派令潛出滋擾或賊番因看守地方並無糧食接濟為饑餓所逼自出偷劫其中情節迥不相同若係該番自出竊掠則其窮迫無能可知若係賊目教令外出則又不可不嚴為防備旺保祿等擒獲二犯時自應

訊究明確分別辦理何得僅以訊無別情一語率行具奏著傳諭旺保祿等嗣後遇有續獲賊番務須悉心詳訊確供勿得仍前草率

丙申

上諭內閣曰川省自辦理軍務以來各土司夷民急公踴躍甚屬可嘉業經疊沛渥恩分別蠲緩今大功指日告成該土司等益加奮勉出力允宜再沛恩膏用昭優恤著加恩將明正木坪二土司乾隆三十八年

緩徵夷賦及三十七八兩年緩徵貢馬全行蠲免并
將三十九年緩徵夷賦貢馬各蠲免十分之五襟谷
廳保縣茂州緩徵三十八年夷賦全行蠲免并将三
十九年緩徵夷賦酌免十分之五龍安叙州寧遠所
屬之雷波越鴛二廳石泉西昌鹽源冕寧四縣及會
理州緩徵三十七年夷賦酌免十分之三松潘漳臘
平番南坪疊溪三十九年夷賦酌免十分之五龍安
建昌會川會鹽寧越越鴛靖遠永定等標營及九姓

土司三十九年夷賦貢馬酌免十分之三其綽斯甲
布革布什咱及巴塘土司四十年分應納貢馬並著
蠲免一次該督董率所屬實力經理務俾邊夷均沾
實惠副朕優厚番民至意該部遵諭速行

臣等謹案川省軍興土司番民敵愾赴功輸誠
恐後我

皇上軫念微勞業已疊加

優渥茲因大兵乘勝深入指顧成功番夷倍知奮勵再

敷

閩惠將闔省土司貢賦普行分別蠲免土兵等踴躍戎

行感

思用命自益不煩驅策由是歲勛迅捷而邊裔永寧共

輯爰閩於

王會也

同日旺保祿王進泰奏言駐防翁固達叅將周玉

隆稟稱外委孟宗賢帶兵前往崇德溝巡邏見有

賊番一人官兵追獲訊名策柰係小金川猛固寨人去年逃進金川分在功噶爾拉居住金川頭人木撕斯令其哨探路徑欲往美諾等處偷放夾壩等語再三嚴訊並無別情隨將該賊番梟首訖奏入

上諭軍機大臣曰旺保祿等奏拏獲賊番策柰所辦尚好現在大兵逼近賊巢金川勢益窮蹙未必能還有多人四出擾劫且美諾距軍營後路尚遠亦不虞其

阻滯但賊番既有探路偷劫之供即非緊要地方亦當加意巡防常青等各處並著一體留意

丁酉阿桂豐昇額色布騰巴爾珠爾海蘭察額森特奏言查現在事機當以攻至瀕河為要臣等親至桑噶斯瑪特之下詳察形勢該處左手第二條山腿地勢稍平佔得此處官兵汲飲有資然後可抽出多兵為直前統截之用且明亮處前敵賊人欲往勒烏圍必先至斯年木咱爾又必由斯年木

咱爾經過茹寨始抵賊巢對岸而茹寨與斯年木
咱爾中間臨河一綫細路在所必經若西路官兵
據住河沿移礮轟打對岸臨河之路則明亮前敵
賊人往來不便情勢必為窘迫臣等密飭官兵砍
伐木植一俟攻克寨落即可運往孳起以便佔據
河沿至前月三十日亥刻賊人偷劫副將李天佑
所駐格布則美第木卡我兵奮力迎戰總兵五福
又從陡烏當噶往援內外合攻賊人被鎗擊死甚

多又本月初二日午刻陝兵營卡之前有賊從溝而上官兵向前衝壓賊人敗至對面山腿其樹林內接應之賊亦即竄逸至初三日子刻又有賊約二百人來擾達斯札溝內卓克采土兵木卡土兵俟賊人近卡放鎗擲石賊不能進總兵保寧帶兵趕往分為兩路合力攻擊賊即渡溝奔竄官兵趕殺殲斃最多又初三日總兵成德領兵修整遜克爾宗礮臺賊從溝底來擾官兵鎗石齊發賊人驚

走官兵乘勢衝擊殺賊數名現仍飭各卡官兵加倍防守

同日阿桂豐昇額色布騰巴爾珠爾又奏言初三日投出尼僧布薄一名稱係小金川別思滿人上年被金川掣去給噶拉依呢瑪噶爾巴家使喚因衣食缺少逃出_臣等察其詞色似非實情初四日據穆塔爾密稟我問布薄據稱並非自己逃出因莎羅奔將布薄喚至勒烏圍令頭人僧格語以汝

是別思滿人可出去告知穆塔爾如今大兵攻打利害我土司索諾木不知是否尚可饒得即寄一實信因此遣我出來臣等察看穆塔爾因莎羅奔等潛遣人與伊說話雖然據實回明尚多恐懼再三慰諭並告以莎羅奔等既遣布薄出來不妨將計就計另差一明白妥當人進去只說我看將軍大人意思土司及作惡大頭人是斷不饒至汝等各自投出可保無事視其實在情形再作辦理臣

等查呢瑪噶爾巴係丹巴沃咱爾女塔其僧格亦
係丹巴沃咱爾親戚或係伊等見勢危急希圖打
聽真信以決行止又不便與布薄當面分付因令
僧格轉述看來賊人弟兄上下之間均不免有各
自為謀之意除一面上緊攻打外再行酌辦均奏

入

上諭軍機大臣曰甲爾納地方逼近賊巢自必悉力拒
守但其地無險可恃賊衆不過為護死支撐之計其

勢斷難久延若我兵相機攻取當不至十分費力阿桂等當實力妥為之又閱脫出番人阿桑供聽見頭人山塌爾薩木坦說官兵取水艱難我們欲到陡烏當噶去截斷後路等語阿桂摺稱賊於前月三十及本月初二初三等日在格布則美第及達斯札溝等處潛出滋擾其地與陡烏當噶一帶相近所供不妄但賊人滋擾四次俱經官兵知覺極力禦擊殲賊頗多並未稍逞伎倆自可不致踈虞惟是功逮垂成

倍宜加意防守阿桂等當嚴飭各將領弁兵等小心
守禦慎之又慎又稱若西路官兵據住河沿可移礮
轟打對河之路所辦甚好阿桂等即當儘力轟催對
河礮卡使賊難以存留明亮等亦當探聽阿桂一路
隔河攻擊稍有得手即領兵前赴斯年木咱爾奮勇
攻勦與阿桂對河官兵遙為夾擊之勢賊必望風潰
散即由彼順取茹寨便可與阿桂夾攻得式梯自更
為得力至另摺所奏穆塔爾密稟金川投出之布薄

看來穆塔爾係誠心投順之人見此詭詐情節即向
將軍實告甚屬可嘉著加恩賞授二等侍衛以示獎
勵

巳亥

上諭軍機大臣曰前已降旨再撥部庫銀五百萬兩合
之九月內所撥之銀共九百萬兩現在各路官兵乘
勝突入大功指日告成諒可無庸復需多費但恐賊
衆自知滅亡在即衛死堅守或尚稍延時日又不得

不為預備著傳諭文綬通核現在兩次所撥九百萬
兩約數幾月支用如尚有應寬餘預備之處著文綬
即行查明據實具奏若果需續撥候朕另降諭旨撥
解

庚子

上諭軍機大臣曰閱阿桂前此覆進地圖據稱柔噶斯
瑪特尚有迤邐斜下河邊山腿四道今補行繪入并
據奏稱柔噶斯瑪特左手等二條山腿地勢稍平得

其沿河寨落即先拏柵佔住等語阿桂之意似欲攻克甲爾納寨再往得式梯但甲爾納寨賊人因其逼近巢穴悉力守拒取之似不甚易若路所必爭轉不免稍羈時日因閱圖內形勢桑噶斯瑪特往南一帶並無山巒阻隔地形稍平若過小河前往可以不由甲爾納寨逕攻得式梯或出其不意可望迅速得手已用珠筆標記其處如前此阿桂在格魯瓦覺必欲攻得遜克爾宗再進經朕用硃筆標示進攻之路阿

桂果越出榮噶爾博等處由羅卜克鄂博進兵遂攻
得作固頂至格爾提一帶與朕所指適相符合則現
在指示硃線或與進兵之路有益亦不可定著將此
圖發給阿桂令其斟酌妥辦

甲辰阿桂豐昇額色布騰巴爾珠爾海蘭察額森
特奏言桑噶斯瑪特左手第一條山腿下沿河寨
落一經攻取可以隔河轟打斯年木咱爾賊人往
來之路因於初七日寅刻臣海蘭察額森特帶兵

從正路進攻又派瑚尼爾圖福康安分為兩翼前進惟是沿河山腿石色之上豎立堅碉碉前又有木城遮護官兵奮勇直下不避鎗石緊貼柵邊賊雖死力抵禦而我官兵俱從木柵縫內用箭射入並拔起木柵即以木棍擊打賊不能支遂將木城攻獲殺賊共五十餘名乘勢進攻戰碉連撲三次直至寨牆之下拋入火彈賊于正面放鎗抵禦其沿河各寨之賊合力來援雖經官兵殲斃甚衆餘仍

潰入石色左右山溝藏匿又從兩旁合力放鎗官兵欲下溝衝殺則此處皆隔陡礮難於直下因徐撤出至是日進攻康薩爾山腿大碉木城亦分為四隊烏什哈達保寧於密拉噶拉木山梁向西南迤邐前進攻第一碉寨特成額進攻第二木城海祿進攻第三木城瑪爾占富紳等進攻第四碉卡並於寅刻各隊齊進其烏什哈達保寧之兵又分兩隊一從山脊直進一從林內穿上其從山脊

直進之兵第一碉內賊人望見卽已併力放鎗鎗
烟濃合密罩碉卡之上官兵轉乘此扳開鹿角直
抵寨下合攻其寨牆上有賊舉鎗外擊經貴州兵
丁孟文光接住鎗桿將賊連鎗掣下立時砍死至
特成額帶兵潛至第二木城突然攻上將外面木
柵拆開賊人窘急卽於內一層捨死抵拒其有露
身木城之上者多被擊斃其海祿所帶官兵逾溝
直取第三木城已將木柵扳倒詎木城之內尚有

石墻周遮堅固憑以竭力死守而瑪爾占等所攻之碉亦至碉根忽有兩隊賊人一從坡上箐中一從溝內共有數十人前來衝突官兵未能直上而榮噶爾博之賊先來接應附近之第一碉經保寧等督兵迎擊殲斃數賊餘皆入碉助守海祿特成額所攻之兩木城亦均有賊接應俱經截殺數人而餘賊從後而入併力固守未能即克各隊遂以次酌撤惟時賊人乘勢衝壓海祿之兵被章京新

達蘇帶領吉林索倫兵接應殲死甚多其特成額處將撤之時亦有賊人下壓特成額出其不意回身接戰亦殲數賊餘俱竄回臣等相度情形當於初八日砍伐木植初九初十兩日拏起木城六座直逼第一碉座賊人情急當有榮噶爾博山梁上賊人百名突來衝撲經放哨官兵望見上前迎擊而臣等又令吉林索倫兵橫截其後中箭殲死而外負傷滾入崖箐者頗多又有賊八九十名從榮

噶爾博山腰衝出復經烏什哈達海祿從旁截殺
殲死更多對面碉卡之內又有賊人來擾經副將
仁和等擊退亦有殺戮_臣等思密拉噶拉木大營
之前官兵連擊木柵直逼康薩爾各碉賊自必移
其力量添聚於此而遜克爾宗此際未經攻打或
防禦稍疎亦未可定_臣豐昇額即於十一日前往
派令成德等正面進攻普爾普等繞出遜克爾宗
前後夾攻其官兵寨右手從前所攻之第三碉令

五岱及索明等帶兵前往以牽賊勢均於十二日
丑刻前進普爾普先往抄截將至寨後遇放哨賊
十餘名官兵上前撲殺八九名餘竄入碉內賊人
始覺齊起放鎗而正面官兵已攻至碉下覓路欲
奪其門為溝壕所阻未能逾越比至黎明臣豐昇
額見寨牆之上賊人排立抵拒即將大砲對準施
放見賊數人為礮轟捲而去攻至辰刻賊人鎗石
愈急亦暫撤回

同日阿桂豐昇顏色布騰巴爾珠爾又奏言查莎羅奔等潛令布溥通信穆塔爾探聽實信則其兄弟間明已各自為謀若置之不理適以堅其并力死守之心臣等公同籌議莫若即令穆塔爾出名作為與莎羅奔之字言土司抗拒大兵種種不法天朝斷不能饒爾莎羅奔本係出家人赴此勒烏圍未破之時或掣得土司投順或先自投順尚可保全性命此外更無別法即書寫番字封固於本月初

十日晚令土兵繫於木桿之上插在賊人卡外次
早見賊人取去如其竟送與莎羅奔固為有益即
或送交索諾木閱看而賊酋尚未及知正可使之
互相疑忌滅亡更為迅速均奏入

上諭軍機大臣曰阿桂等奏進攻桑噶斯瑪特山腿下
碉柵並攻撲康薩爾遜克爾宗等處賊碉此次官兵
攻剽頗為奮勉乃以賊人抗拒甚力官兵尚未得手
蓋賊衆因其地逼近巢穴故并力堅守以冀緩死須

史亦情事所應有但將軍等業已乘勝突入此時功
速垂成自不肯因一時剝擊稍難致稽進取而輕率
撲礮亦不免稍有挫損於事無益看來賊人明知官
軍必由此路進攻遂聚集於此拒守自不宜專以力
爭昨因檢閱地圖見桑噶斯瑪特往南一帶並無山
巒阻隔地形亦覺稍平若過此河前往可不由甲爾
納寨徑攻得式梯礮卡因用硃筆標記圖內諭交阿
桂酌量妥辦若甲爾納一帶尚未攻得似當由硃筆

標誌之路進攻或可望出其不意迅速奏捷阿桂等務須努力為之又所奏令穆塔爾出名作為與莎羅卉之字繫於木桿挿在賊人卡外此事尚無闕礙或稍有機會亦未可知但此等究如治病偏方有無皆不足恃總以奮力進攻勿稍疎懈為要

乙巳明亮舒常奏言據投番山查明供稱聞賊人言木池是堆積糧餉火藥之地欲攢多人潛來搶掠_臣等抽派土兵四百名即日前往木池預備並

飛札駐守游擊瑚圖禮一體嚴防嗣據報初六日
二更後果有賊百餘人從對面山頂潛下來奪碉
卡守卡土兵放鎗抵拒又有賊從木戍溝來撲營
盤及綽斯甲布碉卡官兵一齊擊殺賊旋戰旋逃
又被埋伏土兵合力尾隨擊死多人又十一日馬
彪報稱初十日亥刻達爾圖官兵營壘約有賊四
五百人分為三股進撲官兵奮力擊退殲賊甚多
又達爾圖頭敵同時亦有賊二百餘人從東南角

直撲營盤官兵鎗石齊施賊退去復來以木板墊
壕冒死攻撲至黎明賊始敗逃見曳屍而去者有
二十餘人帶傷者亦不少

同日富德奏言

臣

於十一日派劉輝祖巴克坦布

等進攻穆谷等處碉卡又令副都統札爾桑等奪
取穆當噶爾山梁汲水之路遊擊佛禧轟打來援
之賊官兵奮勇前進奪獲穆當噶爾卡子五座斃
賊三四十人賊衆竄入壕溝從孔中施放鳥鎗山

峯上滾石如雨恚力死守其劉輝祖進攻穆谷之
兵賊番早已知覺鎗石齊發官兵向上衝擊又有
賊百餘自林箐潛來斷後適遇吉林索倫接應之
兵奮力截殺殲死十餘人餘俱受傷潰竄因將各
路官兵徐徐撤回臣每逢調兵即將後路一切要
隘營卡俱交總兵英泰防守均奏入

上諭軍機大臣曰軍營後路均關緊要現在明亮一路
賊至即經勦殺昨阿桂奏榮噶爾博寨旁潛來之賊

亦經官兵等知覺擊退茲富德亦奏將後路要隘營
卡派英泰專司防範等語是各處軍營防守尚俱嚴
密目下正當大兵深入尤應加意防禦不可稍有疎
虞至達爾圖一帶久未進攻賊人屢次侵擾未嘗不
思乘我之隙今既喫虧而去未必復敢自投羅網但
我軍不於此路進攻情形賊匪亦未嘗不窺及或竟
將達爾圖一路之賊撤往他處并力堵禦自屬情理
所有明亮等當留心偵探如達爾圖之賊有潛撤形

迹仍當令舒常星速統兵潛往進攻但賊人狡詭異常官兵若有移動賊衆易於窺察舒常如欲移兵前往務須不動聲色出其不意庶望得手斷不可稍露端倪致賊人得以預為準備明亮舒常均宜慎密安辦

已酉阿桂豐昇額色布騰巴爾珠爾海蘭察額森特奏言查官兵所拏木柵已距康薩爾賊人第一碉座不及一箭之地當派烏什哈達等由山脊前

進海祿等從樹林中穿上合攻又從噶克卓克采
兩土司均於十三日來營懇請帶兵出力因即令
攻第一碉下之木城三座大碉一座臣等復思康
薩爾上截石碉木城雖已分頭攻撲而其山腿下
之碉寨亦應同日進攻使彼此不能相顧又派福
康安等從左進攻額爾特從右進攻並各派兵接
應十六日寅刻烏什哈達之兵踴躍向前將賊碉
前兩層木柵拆燬并將鹿角焚燒直抵碉下而賊

人鎗石如雨並即出碉抗拒兩路官兵合力擊殺
殲死二十餘人餘竄入碉死守其三雜谷之兵將
至碉前賊人先已集七八十人抵禦土兵鏖戰殲
賊十餘名賊人三次出柵來衝均被擊敗亦有殲
戮攻至辰刻因木城內鎗砲甚緊恐有多傷漸次
撤回其烏什哈達等兩隊官兵亦徐撤下至福康
安額爾特之兵同時並進而碉寨前尚有大小石卡
一座官兵先雖進卡內殺賊數名其餘棄卡而逃

遂將石卡搶獲旋即進攻碉卡而各處救援之賊已分為兩股抄截前來經吉林索倫官兵分頭迎敵奮力攢射殲斃甚多因碉寨高堅守禦甚固亦將官兵撤下奏入

上諭軍機大臣曰阿桂等所派官兵等奮勇直前可期迅奏虜功惟是賊人當此護巢衛死之時守拒倍力攻剽自不免稍難但不可因此稍生遲待之計亦不可不籌度利害令官兵輕率撲碉致稍挫損惟在阿

桂等妥酌行之至閱逃出之金川番人達谷等供稱賊人將勒烏圍納木迪等處糧食各項俱用皮船搬往噶拉依等語看來賊酋等雖同在勒烏圍若見官兵攻打勢盛自必仍遁回噶拉依為負隅之計阿桂等若能攻圍嚴緊使賊衆無從竄逸方為妥善設或賊酋等竟竄往噶拉依務即統兵追躡儘力攻剿期速掃穴擒渠斷不可稍有懈緩官兵若攻克勒烏圍已得金川要地十之八九所存惟噶拉依一隅賊衆

諒亦不能久抗即稍有羈延不過正二月間可以藏
事今所撥軍需兩次又有九百萬兩約計可用至來年
四五月阿桂等當與富勒渾文綬預為詢商如軍需
各項尚覺不敷即可據實奏聞以便及早撥往總在
尅日成功即再多費數百萬金亦斷不惜

平定兩金川方略卷一百十一